

# EMAI BÈN MAI

Tout l'estiéu, secaresso, calourado e boufarado an mes lou fiò is estoupo...



# Prouvènço d'aro

Tóuti li mes, lou journau de la Prouvènço d'aro

Setèmbre de 2022

n° 390

2,10 €

## Lou bèu tèms en Prouvènço

Couquin d'estiéu, aquest an estivè long-tèms, t'a fach uno bello caud que brulavo. Aquí au gros de la calourasso, la poulido escalado di degrad sus lou termoumètre nous a bèn fa susa. Pas proun d'acò lou fiò se i'es mes, empura que mai pèr la calour dins la secaresso di bos e garrigo. Proche Maiano, la Mountagneto cremavo coume un fiò-de-sant-Jan. Que vènt que faguèsse, cisampo, aguieloun o ventoureso, de fioc en fiò, l'auro perdié pas soun boufe rabinous.

L'espèro dis aurige coustumié dóu 15 d'avoust fuguè longo, mai, pecaire, se la Prouvènço ausiguè li tron, eissuguè fin finalo qu'uno raissado passagiero, pau o proun forto pamens pèr endrè pèr sourti d'aquelo calour aclapanto e amoussa li fioucas. Basto! avèn agu de mau-tèms, mai un tèms casso l'autre. Coume dis lou prouvèrbi "À N.-D. de Setèmbre plòu souvènt", sara pas trop lèu... pièi "À la fin tout s'oublido". Pamens dins aquelo bouloverso estivalo, l'ana dóu mounde countuniavo.

## Lou libre blanc di region

Dins nosto toco de sauvamen de nosto lengo, n'erian resta à l'interpelacioun dóu Gouvèr pèr la presidènto di Region de Franço, Carolo Delga, e soun soute-presidènt, Renaud Muselier, emé lou "Libre blanc" pèr la descentralisacioun ounte counsacravon uno pajo à l'aparamen di lengo regiounalo soute lou titre "Proutegi li carateristico istourico, soucialo e culturalo de soun territòri": Li lengo regiounalo apartènnon au patrimòni de la Franço, permeton de rassembla e de crea de la couèsioun dins uno soucieta. L'ensignamen bilengue immersiu valouriso lou patrimòni, enrichis e ameiuoro li capacita d'aprendissage dis enfant.

Lou nouvèu Gouvèr a degu ausi lou message que lou 20 de juillet la proumièro menistro, Elisabeth Borne, reçaupèguè à Matignoun tóuti li presidènt de region. Saupre dins la barjadisso se n'en vengueron à parla di lengo regiounalo? Carolo Delga i'es anado de redire que "li region èron lèsto à respondre i grando criso que traverson noste país: demoucratico, soucialo, ecounoumico, climatico e sanitari e que dèvon pas en èstre entrepachado pèr manco de fisanço vo pèr de countrencho financiero e teinoucratico." E bèn segur a souveta qu'aquelo reünion "durbiguèsse uno proumièro estapo de travail autour di proupousicioun emesso dins lou libre blanc di region vers uno Republico de la counfisanço". Mai de counclure: "jujaren sus lis ate councrèt". D'aquéu rescontre à l'oustau Matignoun, lou gouvèr n'a fa lou raport: "Dins de

## À la presidènci di region



doumaine tau que l'ecounoumio, l'emplé, la fourmacion, l'educacioun e l'ourientacioun, la couèsioun di territòri, la moubileta, la transicioun ecolougico, la santa, lou tourisme e l'agriculturo, l'Estat e li Region soun moubilisa pèr adurre de responso councrèto i besoun di Francés". Li lengo regiounalo soun belèu aquí dins l'encastre dóu doumaine de l'educacioun, mai pas rên lou preciso...

La proumièro menistro e li baile di region aurièn decida d'engaja un travail visant de jita li baso d'un nouvèu partenariat emé l'ambicioun de baia à soun travail uno dimenscion ouperaciounalo mai marcado. Pièi dins l'encastre d'un prougrame de travail coumun s'engajon à trouba de soulucion lèsto à èstre messo en obro rapidamen pèr ajougne l'oujeitiéu dóu plen emplé e de la transicioun ecolougico.

Acò es proun pounchu, mai baio de gisclè.

Nous dison que l'ambicioun partejado a trouba de soulucion rapido pèr quatre chan-tié prioritari:

1 - Lou plen emplé. S'agis dóu piloutage de l'ofro de fourmacion e dóu service public de l'emplé.

2 - La transicioun ecolougico. Acò es de modo à l'ouro d'aro, ié van arriba emé "la soubrieta founciero, la preservacion de la bioudiversita, l'acoumpagnamen di nouvèu biais de vido, la decarbounisacion e l'asatacioun i counsequènci dóu chanjamen climatic".

3 - Li moubilita. Lou ferrouviere es la coulouno vertebralo d'uno moubilita proprio...

4 - La recoustrucion ecounoumico e endustrialo. Pèr reüssi se fau apiela sus lis ecousistèmo regiounau. L'Estat e li Region s'engajon à travaia à-n-uno meso en obro territourialisado de Franço 2030.

Pas proun d'acò dins li tematico prioritari

coume dison s'apound:

5 - Outro-mar. L'Estat engajara prouchenamen un dialogue.

6 - Corso. La necessita de faire abouti li discussioun sus l'aveni de l'isclò.

"Un principe de pragmatisme et de souplesse doit caractériser les solutions retenues". Coumprenèn ni tourro ni bourro dins aquéu lengage, mai anan pas cerca de rognò pèr se grata.

Nous dison qu'aquelo reünion a permès d'abouti à-n-uno declaracioun coumuno que fissa un proumié cadre metoudoulougique e un calendié precis.

Un proumié rendès-vous es adeja prougrame emé la proumièro menistro, dono Borne, que counfiermo sa vengudo au Coungrès di Region que se debanara à Vichi, li 15 e 16 setèmbre. Vichi es en país d'oc... Gardan lis esperanço...

Gerard Lybien

## Lou sant-Miquèu dóu CREDD'O

Lou Cèntre de recerco pren plaço dins de nouvèu loucau à Gravesoun.

Pajo 5

## L'arribado de l'aigo à Marsiho

Lou canau de Prouvènço rèsto la grando sourso d'alimentacioun en aigo...

Pajo 6

## La lavando un proudu chimique

Dangeirouso après d'ünis analiso mouliculàri que monstron d'alergène...

Pajo 7